

Taflen Wybodaeth y Claf 20

Deddf Iechyd Meddwl 1983

Adran 48 (ac Adran 49): Carcharor Heb ei Ddedfrydu'n Cael ei Drosglwyddo i Ysbyty o Garchar Remánd neu Ganolfan Remánd â Chfyngiadau neu heb Gyfyngiadau

Rydych wedi cael eich derbyn i:

Eich Clinigwr â Chyfrifoldeb yw:

Dyddiad dechrau eich cadw dan adran 48/49:

Pam yr wyf yn yr ysbyty?

Rydych wedi cael eich trosglwyddo i'r ysbyty oherwydd bod yr Ysgrifennydd Gwladol dros Gyfiawnder yn fodlon – ar sail cyngor dau feddyg – bod gennych anhwylder meddyliol y mae angen i chi gael triniaeth frys a bod yn yr ysbyty o'i herwydd. Mae'r Ysgrifennydd Gwladol dros Gyfiawnder wedi llofnodi cyfarwyddyd trosglwyddo dan adran 48 o Ddeddf Iechyd Meddwl 1983 i'ch trosglwyddo i ysbyty.

Efallai y byddwch hefyd yn destun cyfarwyddyd cyfyngu.

Beth yw cyfarwyddyd cyfyngu?

Mae'n golygu na allwch gael eich rhyddhau o'r ysbyty oni bai fod yr Ysgrifennydd Gwladol dros Gyfiawnder yn rhoi caniatâd i chi adael. Tra byddwch yn yr ysbyty, rhaid i'ch clinigwr â chyfrifoldeb sicrhau cytundeb yr Ysgrifennydd Gwladol dros Gyfiawnder cyn y gallwch fod yn absennol dros dro neu gael eich anfon i ysbyty arall.

Am ba hyd y byddaf i yma?

Os ydych wedi cael eich trosglwyddo yma:

o'r carchar neu ganolfan remánd:

- byddwch yn cael eich cadw yn yr ysbyty nes y bydd eich clinigwr â chyfrifoldeb yn dweud nad oes angen triniaeth arnoch mwyach neu nes y bydd y llys wedi dod i benderfyniad ynghylch eich achos.

ar ôl i chi gael eich remandio gan Lys Ynadon:

- bydd y gorchymyn trosglwyddo'n dod i ben pan fydd eich cyfnod remandio'n dod i ben, oni bai eich bod yn cael eich anfon i Lys y Goron i sefyll eich prawf.
- gall y Llys Ynadon orchymyn i'r cyfarwyddyd trosglwyddo ddod i ben os yw eich clinigwr â chyfrifoldeb yn dweud nad oes angen i chi gael triniaeth feddygol ar gyfer anhwylder meddyliol yn yr ysbyty mwyach. Byddech wedyn yn dychwelyd i'r carchar neu ganolfan remánd.

fel carcharor sifil neu dan Ddeddf Mewnfudo 1971:

- ni fyddwch yn cael eich cadw ar ôl y dyddiad y byddai eich dedfryd neu'ch cyfnod cadw'n dod i ben, oni bai fod eich clinigwr â chyfrifoldeb yn dweud bod angen i chi aros yn yr ysbyty i gael rhagor o driniaeth. Os felly, byddwch yn cael taflen arall i egluro beth fydd yn digwydd.

Beth fydd yn digwydd os byddaf yn mynd yn ôl i'r llys?

Os nad ydych wedi sefyll eich prawf eto, efallai y bydd yn rhaid i chi fynd yn ôl i'r llys. Bydd y llys yn edrych ar eich achos, ac efallai y bydd yn cyflwyno gorchymyn ysbyty neu warcheidiaeth dan adran 37 Deddf Lechyd Meddwl 1983, neu efallai y bydd yn rhoi dedfryd o garchar i chi.

Cynlluniau gofal

Bydd gennych 'gynllun gofal' unigol tra byddwch yn yr ysbyty. Byddwch yn cael asesiad yn rhan o'r cynllun hwnnw, a bydd eich gofal a'ch triniaeth yn cael eu seilio ar eich cryfderau personol. Os ydych yn dymuno, byddwch ynghlwm wrth weithredu eich cynllun gofal eich hun yn ogystal â bod ynghlwm wrth ei gynllunio.

Bydd gennych gydlynedd i ddatblygu eich cynllun gofal, a bydd yn cysylltu â phobl eraill sydd â diddordeb perthnasol yn eich gofal, gan gynnwys eich clinigwr â chyfrifoldeb, eich gweithiwr cymdeithasol, eich gofalwr os oes gennych un, a'ch ffrindiau a'ch perthnasau os byddwch yn cytuno â hynny. Wedi iddo gael ei ddatblygu, bydd eich cynllun gofal yn nodi'r amserlenni y cytunwyd amynt ar gyfer gweithredu agweddau amrywiol ar y cynllun. Bydd yr agweddau hynny'n cynnwys eich triniaeth feddygol, eich gofal iechyd corfforol, a gwaith paratoi ar gyfer y cyfnod ac ymdrin â'r cyfnod wedi i chi gael eich rhyddhau.

Bydd eich cynllun gofal yn cael ei gofnodi'n ysgrifenedig, a gallwch ei lofnodi os ydych yn dymuno. Byddwch yn cael copi ohono hefyd. I gael mwy o wybodaeth am yr hyn y bydd eich cynllun gofal yn ei gynnwys, gofynnwch am gopi o'r llyfryn 'Tawelwch Meddwl' sy'n sôn am God Ymarfer Cymru.

A allaf i apelio?

Ni allwch apelio yn erbyn penderfyniad yr Ysgrifennydd Gwladol dros Gyfiawnder i'ch trosglwyddo i ysbyty, o garchar neu ganolfan remánd neu ar ôl i chi gael eich remandio gan Lys Ynadon. Fodd bynnag, gallwch wneud cais i Dribiwnlys Adolygu Iechyd Meddwl Cymru unrhyw bryd yn ystod y chwe mis cyntaf wedi i chi gael eich trosglwyddo. Gallwch wneud cais arall yn ystod yr ail gyfnod o chwe mis ac unwaith bob blwyddyn wedi hynny.

Os bydd Tribiwnlys Adolygu Iechyd Meddwl Cymru yn penderfynu nad oes angen triniaeth arnoch yn yr ysbyty, ni fydd hynny'n golygu y gallwch chi adael yr ysbyty. Gallech chi gael eich anfon yn ôl i'r carchar oni bai fod y Tribiwnlys yn dweud y dylech chi aros yn yr ysbyty.

Beth sy'n digwydd mewn gwrandawriad o flaen Tribiwnlys Adolygu Iechyd Meddwl Cymru?

Mae'r Tribiwnlys yn annibynnol ar yr ysbyty. Bydd aelodau'r Tribiwnlys yn dod i gwrdd â chi, a byddant yn gwrandao ar eich barn chi a barn eich cynrychiolydd (os oes gennych un). Bydd meddyg y Tribiwnlys yn ymweld â chi cyn gwrandawriad y Tribiwnlys. Bydd yn siarad â'ch clinigwr â chyfrifoldeb a phroffesiynolion eraill sydd ynghlwm wrth eich gofal, a bydd yn darllen adroddiadau am eich amodau cadw a'ch gofal cyn penderfynu a ydych yn ddigon da i gael eich rhyddhau. Bydd y Tribiwnlys yn ysgrifennu atoch cyn pen 7 diwrnod i ddyddiad y gwrandawriad i roi gwybod i chi beth yw ei benderfyniad.

Efallai y byddwch am ofyn i gyfreithiwr eich helpu gyda'r Tribiwnlys. Mae gan yr ysbyty gopi o restr Cymdeithas y Cyfreithwyr o gyfreithwyr arbenigol, neu efallai y byddwch am ddefnyddio eich cyfreithiwr eich hun. Fel rheol, gallwch wneud hynny'n rhad ac am ddim dan y cynllun cymorth cyfreithiol.

Cyfeiriad swyddfa'r Tribiwnlys yw:

Tribiwnlys Adolygu Iechyd Meddwl Cymru
Adeiladau'r Goron
Parc Cathays
Caerdydd CF10 3NQ

Gwasanaeth Eiriolaeth Iechyd Meddwl Annibynnol

Bydd modd i chi ddefnyddio'r gwasanaeth eiriolaeth iechyd meddwl annibynnol, sy'n wasanaeth cyfrinachol. Bydd y gwasanaeth hwn yn rhoi cymorth i chi ac yn eich helpu i ddeall y Ddeddf.

Bydd y gwasanaeth yn eich helpu i gael gwybodaeth am eich hawliau cyfreithiol, unrhyw driniaeth feddygol y gallech chi fod yn ei chael, a'r modd y gallwch apelio yn erbyn cael eich cadw.

Os ydych yn cael unrhyw drafferth deall y daflen hon, neu os oes gennych unrhyw gwestiynau eraill, gallwch ofyn i'r gwasanaeth eiriolaeth iechyd meddwl annibynnol am help.

Pa driniaeth y byddaf i'n ei chael?

Bydd y clinigwr cymeradwy sydd â gofal am eich triniaeth yn siarad â chi am unrhyw driniaeth sydd ei hangen arnoch ar gyfer eich anhwylder meddyliol.

Gellir rhoi meddyginiaeth neu gyffuriau i chi ar gyfer eich anhwylder meddyliol am hyd at dri mis heb eich cydsyniad. Os bwriedir i'r driniaeth barhau am fwy na thri mis, ac os na fyddwch yn cydsynio neu na allwch gydsynio, gofynnir i feddyg annibynnol ymweld â chi. Caiff y meddyg hwnnw ei alw'n feddyg a benodwyd i roi ail farn. Bydd y meddyg dan sylw'n siarad â chi ac yn siarad â nyrs neu aelodau eraill o staff sy'n eich adnabod yn yr ysbyty. Ni fydd y driniaeth yn parhau oni bai fod y meddyg annibynnol yn cytuno y dylech ei chael. Efallai y bydd meddyginiaeth arall yn cael ei hargymell ar ôl i'r meddyg annibynnol siarad â'r clinigwr cymeradwy sydd â gofal am eich triniaeth.

Sut y gallaf i gwyno?

Os byddwch am gwyno am y ffordd yr ydych yn cael eich trin yn yr ysbyty, dylech siarad â'r unigolyn sydd â gofal am eich ward neu dylech siarad â nyrs neu weithiwr cymdeithasol. Os nad ydych yn hapus â'r ateb, gallwch ysgrifennu at reolwyr yr ysbyty yn y cyfeiriad canlynol: (Gwybodaeth i'w hychwanegu yn lleol)

Os na fyddwch yn hapus ag ymateb y rheolwyr, gallwch ofyn am help gan y Gwasanaeth Adolygu ar gyfer Iechyd Meddwl. Sefydlwyd y Gwasanaeth Adolygu i wneud yn siŵr bod y gyfraith iechyd meddwl yn cael ei defnyddio'n iawn a bod cleifion yn cael y gofal priodol pan fyddant yn yr ysbyty.

Gallwch ysgrifennu atynt yn y cyfeiriad isod:

Y Gwasanaeth Adolygu ar gyfer Iechyd Meddwl
Arolygiaeth Gofal Iechyd Cymru
Tŷ Bevan
Parc Busnes Caerffili
Heol y Fan
Caerffili CF83 3ED

Neu gallwch ffonio: 029 2092 8858
Neu gallwch ffacsio: 029 2092 8904

neu gallwch siarad ag Adolygydd pan fydd yn ymweld. Gall rheolwr y ward roi dyddiad yr ymweliad nesaf i chi.

Gallwch hefyd ysgrifennu at y Gwasanaeth Adolygu ar ôl i chi adael yr ysbyty. Gallwch ysgrifennu at y Comisiwn wedi i chi adael yr ysbyty hefyd.

Eich llythyrau

Fel rheol, byddwch yn gallu ysgrifennu at unrhyw un ac yn gallu cael llythyrau a pharseli gan unrhyw un. Os bydd rhywrai wedi dweud nad ydynt am gael llythyr neu barsel gennych, mae'r Ddeddf Iechyd Meddwl yn rhoi pŵer i reolwyr yr ysbyty atal unrhyw lythyrau neu barseli a anfonir gennych atynt. Byddwch yn cael gwybod yn ysgrifenedig os digwydd hynny.

Cod Ymarfer Cymru

Mae Cod Ymarfer Cymru yn rhoi cyngor i staff ynghylch Deddf Iechyd Meddwl 1983. Bydd yn rhaid iddynt feddwl am yr hyn y mae'r Cod yn ei ddweud pan fyddant yn gwneud penderfyniadau ynghylch eich gofal. Gallwch ofyn am gael gweld copi o'r Cod, neu gallwch ofyn am gopi o'r llyfryn 'Tawelwch Meddwl' sy'n sôn am God Ymarfer Cymru.

Mwy o wybodaeth a help

Os oes unrhyw beth nad ydych yn ei ddeall ynglŷn â'ch gofal a'ch triniaeth, bydd aelod o'r staff yn barod i'ch helpu. Gofynnwch i un o'r staff am esboniad os oes unrhyw beth yn aneglur yn y ffurflen hon, neu os oes gennych fwy o gwestiynau.

Mae'r gwasanaeth eiriolaeth iechyd meddwl annibynnol ar gael hefyd i'ch helpu a'ch cefnogi.

Cofiwch ofyn os hoffech gael copi o'r daflen hon i'w roi i rywun arall.